

Na osnovu člana 18. tačka b) Ustava Kantona Sarajevo („Službene novine Kantona Sarajevo“, br. 1/96, 2/96-Ispravka, 3/96-Ispravka, 16/97, 14/00, 4/01, 28/04, 6/13 i 31/17), Skupština Kantona Sarajevo, na sjednici održanoj dana godine, donijela je

NACRT

Z A K O N

O JAVNIM PRIREDBAMA I DRUGIM OBLICIMA OKUPLJANJA NA PODRUČJU KANTONA SARAJEVO

DIO PRVI – OPĆE ODREDBE

Član 1. **(Predmet)**

Ovim zakonom se uređuju javne priredbe i drugi oblici okupljanja, odnosno omogućava se, podržava i štiti sloboda navedenih javnih okupljanja na području Kantona Sarajevo.

Član 2. **(Značenje izraza)**

Pojedini izrazi upotrijebljeni u ovom zakonu imaju sljedeće značenje:

- a) javno okupljanje u pokretu je okupljanje na području Kantona Sarajevo koje se odvija kretanjem učesnika u određenom prostoru, može se odvijati kretanjem i kratkotrajnim zaustavljanjem učesnika na određenim mjestima između mjesta polaska i mjesta završetka kretanja,
- b) javno mjesto je mjesto na koje je slobodan pristup neodređenom broju lica, bez ikakvih uslova (ulice, trgovi, javni putevi, parkovi, izletišta, čekaonice, ugostiteljske, trgovinske i zanatske radnje i sl.) ili pod određenim uslovima (sportski stadioni i igrališta, bioskopske, pozorišne i koncertne sale, izložbene prostorije i sl.), druga mjesta koja u određenom vremenskom periodu služe za ovakve svrhe (zemljišta, prostori ili prostorije u kojima se održavaju javni skupovi, takmičenja i sl.), kao i mjesto koje je dostupno vidiku sa javnog mjesta (balkoni, terase, hodnici, dvorišta i sl.) ili ako je posljedica prekršaja propisanih odredbama ovog zakona nastupila na javnom mjestu,
- c) učesnici javnog okupljanja su organizator javnog okupljanja, voditelj javnog okupljanja, redari i lica koja prisustvuju javnom okupljanju,
- d) nadležna organizaciona jedinica Uprave policije Ministarstva unutrašnjih poslova Kantona Sarajevo (u daljnjem tekstu: Uprava policije) je policijska uprava u Upravi policije na čijem području se održava javno okupljanje ili Sektor uniformisane policije ako se javno okupljanje održava na području dvije ili više policijskih uprava, kao i Sektor za policijsku podršku ili druga organizaciona jedinica Uprave policije koje, u skladu sa aktom o unutrašnjoj organizaciji Ministarstva unutrašnjih poslova Kantona Sarajevo (u daljnjem tekstu: Ministarstvo), imaju nadležnost za postupanje u oblasti javnih okupljanja i
- e) poslovi na osiguranju javnog reda i mira izvan redovne djelatnosti Uprave policije su poslovi na osiguranju javne priredbe koji zahtjevaju dodatni angažman i pružanje usluga u ljudstvu i materijalno-tehničkim sredstvima, a koji inače ne bi bili angažovani da se javna priredba ne održava.

Član 3. **(Osnovna načela)**

- (1) Svako ima pravo da organizuje javno okupljanje i da u njemu učestvuje, u skladu sa odredbama ovog zakona.

- (2) Uprava policije i njene nadležne organizacione jedinice, kao i drugi nadležni organi, dužni su omogućiti, podržavati i štiti slobodu javnog okupljanja, promovisući:
- presumpciju u korist održavanja javnog okupljanja,
 - obvezu države da štiti pravo na slobodu javnog okupljanja,
 - načelo nediskriminacije u skladu sa odredbama Zakona o zabrani diskriminacije („Službeni glasnik BiH“, broj 59/09 i 66/16) i
 - načelo srazmjernosti.
- (3) Nadležna organizaciona jedinica Uprave policije je dužna spriječiti ometanje ili onemogućavanje javnog okupljanja koji se održava u skladu sa odredbama ovog zakona.
- (4) Kada nadležna organizaciona jedinica Uprave policije vodi postupak i rješava u skladu sa odredbama ovog zakona, dužna je preduzimati mjere koje ne prelaze granice onoga što je odgovarajuće, potrebno i nužno za postizanje cilja u svakom konkretnom slučaju.

Član 4.

(Supsidijarna primjena zakona)

- (1) U upravnim stvarima koje nisu uređene ovim zakonom, supsidijarno se primjenjuju odgovarajuće odredbe Zakona o upravnom postupku („Službene novine Federacije BiH“, br. 2/98 i 48/99).
- (2) Ukoliko pojedina pitanja nisu regulisana važećim zakonom koji se odnosi na sprječavanje nasilja i nedoličnog ponašanja na sportskim priredbama na području Kantona Sarajevo, odredbe ovog zakona primjenjuju se i na sportske priredbe.

Član 5.

(Ravnopravnost spolova)

Gramatička terminologija korištenja muškog ili ženskog spola u ovom zakonu podrazumijeva uključivanje oba spola.

DIO DRUGI – JAVNE PRIREDBE

POGLAVLJE I – OPĆE ODREDBE O JAVNIM PRIREDBAMA

Član 6.

(Pojam javnih priredbi)

- (1) Pod javnim priredbama podrazumijevaju se javna okupljanja organizovana radi ostvarivanja prihoda u okviru registrovane djelatnosti koja, s obzirom na očekivani broj učesnika i prirodu javne priredbe, zahtijevaju preduzimanje posebnih mjera sigurnosti.
- (2) Javne priredbe mogu se organizovati na otvorenom ili u zatvorenom prostoru namijenjenom ili prikladnom za njihovo održavanje.

Član 7.

(Ograničenje javne priredbe)

- (1) Javna priredba može se ograničiti u izuzetnim slučajevima propisanim ovim zakonom.
- (2) Javna priredba može se ograničiti radi:
- interesa javne sigurnosti ili javnog reda i mira,
 - sprečavanja izvršenja krivičnih djela i
 - zaštite zdravlja, morala ili zaštite prava i sloboda drugih lica koje se zasniva na principima proporcionalnosti.

- (3) Javnu priredbu ne može sazvati niti organizovati politička organizacija ili udruženje građana čiji je rad zabranjen, kao ni lice kojem je pravosnažnom sudskom odlukom izrečena zaštitna mjera zabrane javnog istupanja, za vrijeme dok ta zabrana, odnosno mjera traje.
- (4) Postojanje razloga za ograničavanje javne priredbe iz st. (2) i (3) ovog člana utvrđuje se za svaki konkretan slučaj.

Član 8.

(Mjesto održavanja javne priredbe)

- (1) Mjesto održavanja javne priredbe je mjesto na kojem se održava javna priredba, kao i prilazni putevi i prostori (uži i širi lokalitet) neposredno uz mjesto održavanja javne priredbe.
- (2) Zatvoreni prostor, kao mjesto održavanja javne priredbe u smislu odredbi ovog zakona je objekat, prostor ili prostorija ograđena ili označena, u kojoj se vrši okupljanje i u koju se može ući ili iz nje izaći samo na za to određenom mjestu.
- (3) Mjesto održavanja javne priredbe je i prostor na kojem se odvija javni saobraćaj kada je moguće dodatnim mjerama obezbjediti privremenu izmjenu režima saobraćaja, kao i zaštitu zdravlja i sigurnost ljudi i imovine.

Član 9.

(Ograničenje mjesta održavanja javne priredbe)

- (1) Održavanje javne priredbe može se ograničiti na sljedećim mjestima:
 - a) u blizini bolnica ako ometa pristup vozilima hitne pomoći ili ako remeti mir bolesnicima,
 - b) u blizini predškolskih ustanova, osnovnih i srednjih škola, dok u njima borave djeca i učenici,
 - c) u nacionalnim parkovima i zaštićenim parkovima prirode, osim mirnih okupljanja koja imaju za cilj unapređenje i popularizaciju zaštite prirode i čovjekove okoline, kao i obilježavanje značajnijih historijskih datuma,
 - d) u blizini spomenika kulture ili u objektima spomenika kulture, ukoliko bi to moglo prouzrokovati njihovo uništenje ili oštećenje,
 - e) na autoputevima, magistralnim, regionalnim i lokalnim putevima i saobraćajnicama na kojima se odvija šinski saobraćaj, ukoliko bi se time ugrozilo nesmetano odvijanje saobraćaja i
 - f) u blizini graničnih prijelaza na način kojim se ugrožava nesmetano kretanje lica i vozila preko granice.
- (2) Javna priredba ne može se održati na mjestu i u vrijeme kada je na tom mjestu od strane drugog organizatora već zakazano održavanje mirnog okupljanja, javnog protesta, javne priredbe ili drugog oblika okupljanja.
- (3) U slučajevima iz stava (2) ovog člana, održavanje javne priredbe će se omogućiti na drugom mjestu koje organizator odredi u skladu sa odredbama ovog zakona.
- (4) U pogledu ograničenja mjesta okupljanja iz stava (1) ovog člana, nadležna organizaciona jedinica Uprave policije odlučuje u svakom konkretnom slučaju, u skladu sa načelima iz člana 3. ovog zakona.

Član 10.

(Ograničenje slobode izražavanja)

- (1) Sloboda izražavanja na javnoj priredbi ograničena je zabranom:
 - a) govora mržnje,
 - b) pozivanja i podsticanja na oružani sukob ili upotrebu nasilja,
 - c) pozivanja i podsticanja na rasnu, vjersku, nacionalnu, etničku ili drugu mržnju ili diskriminaciju i

d) radi zaštite zdravlja i morala, ugleda ili prava drugih.

(2) Na javnoj priredbi ne može istupati lice iz člana 7. stav (3) ovog zakona.

POGLAVLJE II – OBAVJEŠTENJE O ODRŽAVANJU JAVNE PRIREDBE

Član 11.

(Obavještenje o održavanju javne priredbe)

- (1) Organizator javne priredbe dužan je dostaviti nadležnoj organizacionoj jedinici Uprave policije obavještenje o održavanju javne priredbe, najkasnije sedam dana prije početka održavanja javne priredbe.
- (2) Obavještenje o održavanju javne priredbe sadrži:
 - a) povod, cilj i program javne priredbe,
 - b) podatke o mjestu, datumu i vremenu održavanja i trajanja javne priredbe,
 - c) procjenu organizatora javne priredbe o broju učesnika javne priredbe,
 - d) ime i prezime, broj lične karte, putne isprave ili drugog identifikacionog dokumenta i kontakt-telefon i email (ako ga ima) organizatora javne priredbe, a kada je organizator javne priredbe pravno lice, naziv i sjedište pravnog lica, kao i ime i prezime, broj lične karte, putne isprave ili drugog identifikacionog dokumenta odgovornog lica u pravnom licu, kontakt-telefon i email (ako ga ima),
 - e) ime i prezime, broj lične karte, putne isprave ili drugog identifikacionog dokumenta i kontakt-telefon i email (ako ga ima) zajedničkog predstavnika, ako ima više organizatora javne priredbe,
 - f) ime i prezime, broj lične karte, putne isprave ili drugog identifikacionog dokumenta i kontakt-telefon i email (ako ga ima) voditelja javne priredbe,
 - g) spisak redara i/ili pripadnika angažovane agencije za zaštitu lica i imovine, sa njihovim ličnim podacima, u skladu s procjenom organizatora i predstavnika nadležne organizacione jedinice Uprave policije, uzimajući u obzir broj učesnika javne priredbe,
 - h) druge podatke za koje od interesa za sigurno održavanje javne priredbe (npr. podaci i obavještenja o prijetnjama, održavanju vatrometa, drugih sadržaja i sl.) i
 - i) potpis podnosioca obavještenja.
- (3) Obavještenje o održavanju javne priredbe ili drugog oblika okupljanja (u daljnjem tekstu: obavještenje) nalazi se na Obrascu broj 1. koji je sastavni dio ovog zakona.
- (4) Svaka bitnija izmjena sadržaja obavještenja, smatra se dostavljanjem novog obavještenja.

Član 12.

(Način postupanja u slučaju nedostavljanja ili dostavljanja neblagovremenog ili nepotpunog obavještenja)

- (1) U slučaju da organizator javne priredbe ne dostavi obavještenje iz člana 11. stav (1) ovog zakona, a javna priredba započne, nadležna organizaciona jedinica Uprave policije će u saradnji sa organizatorom javne priredbe, ukoliko postoji neki od uvjeta iz člana 14. stav (1) tač. a), b), c), d) i g) ovog zakona, postupiti u skladu sa odredbama člana 24. ovog zakona.
- (2) Ukoliko organizator javne priredbe obavještenje ne dostavi u roku iz člana 11. stav (1) ovog zakona, nadležna organizaciona jedinica Uprave policije će, u saradnji sa organizatorom javne priredbe, na osnovu procjene stanja sigurnosti, utvrditi postoje li uvjeti za sigurno održavanje javne priredbe.
- (3) U slučaju da obavještenje ne sadrži sve podatke iz stava člana 11. stav (2) ovog člana, nadležna organizaciona jedinica Uprave policije će pisanim putem obavijestiti organizatora javne priredbe o potrebi da odmah, a najkasnije u roku od 24 sati od zaprimanja obavještenja, otkloni nedostatke i izvrši dopunu obavještenja.

- (4) Ukoliko se na osnovu provedenih aktivnosti iz stava (3), ne izvrši dopuna obavještenja ili organizator odbije da ustupi podatke iz člana 11. stav (2) ovog zakona, smatra se kao da obavještenje nije ni dostavljeno i nadležna organizaciona jedinica Uprave policije postupa u skladu sa odredbama člana 14. ovog zakona.

Član 13.

(Način dostavljanja obavještenja)

- (1) Potpisano obavještenje se dostavlja lično, preporučenom pošiljkom, faksom ili putem elektronske pošte.
- (2) Rok za dostavljanje obavještenja iz člana 11. stav (1) ovog zakona, kada se ista šalje preporučenom pošiljkom, počinje teći od dana predaje pošti pošiljke koja je upućena.

Član 14.

(Zabrana održavanja javne priredbe)

- (1) Nadležna organizaciona jedinica Uprave policije rješenjem će zabraniti održavanje javne priredbe ako:
- a) nije blagovremeno i uredno dostavljeno obavještenje,
 - b) postoji stvarna opasnost da bi održavanjem javne priredbe bili ugroženi sigurnost i zdravlje ljudi i imovina ili bi došlo do stvarne opasnosti od vršenja krivičnih djela, kao i nasilja ili narušavanja javnog reda i mira u većem obimu,
 - c) je prijavljena na mjestima na kojima se, u skladu sa odredbama ovog zakona, ne može održavati i
 - d) organizator javne priredbe okupljanja nije postupio ili nije blagovremeno postupio po naloženim mjerama od strane nadležne organizacione jedinice Uprave policije.
- (2) Nadležna organizaciona jedinica Uprave policije rješenjem odlučuje o zabrani održavanja javne priredbe, na osnovu utvrđenih činjenica prikupljenih u svakom konkretnom slučaju, uz pridržavanje načela iz člana 3. ovog zakona.
- (3) Rješenje iz stava (1) ovog člana donosi se i dostavlja najkasnije 72 sata prije zakazanog termina održavanja javne priredbe.

Član 15.

(Pravo na žalbu)

- (1) Protiv rješenja iz člana 14. ovog zakona organizator javne priredbe može izjaviti žalbu najkasnije 24 sata nakon njegovog dostavljanja.
- (2) Žalba se podnosi ministru Ministarstva (u daljnjem tekstu: ministar).
- (3) Žalba ne odlaže izvršenje rješenja.
- (4) Postupak po žalbi je hitan. Rješenje po žalbi donosi se i dostavlja organizatoru javne priredbe najkasnije u roku od 24 sata od prijema žalbe.
- (5) Organizator javne priredbe dužan je odmah po prijemu rješenja kojim se zabranjuje javna priredba obavijestiti javnost o tome i po mogućnosti ukloniti istaknuta obavještenja o sazivanju javne priredbe.
- (6) Protiv rješenja iz stava (4) ovog člana može se pokrenuti upravni spor pred nadležnim sudom.

Član 16.

(Održavanje javne priredbe na putu)

- (1) Ako javna priredba zahvata i površinu puta, usljed čega bi saobraćaj bio obustavljen ili ometan, organizator javne priredbe je dužan uz obavještenje priložiti i odobrenje nadležnog organa u skladu sa Zakonom o osnovama sigurnosti saobraćaja na putevima u Bosni i Hercegovini („Službeni glasnik BiH“, br. 6/06, 75/06, 44/07, 84/09, 48/10, 18/13, 8/17, 89/17 i 9/18).

- (2) Nadležna organizaciona jedinica Uprave policije, na osnovu dostavljene dokumentacije, u skladu sa odredbama člana 162. zakona iz stava (1) ovog člana i člana 78. Zakona o uređenju saobraćaja na području Kantona Sarajevo („Službene novine Kantona Sarajevo, br. 30/17 i 46/17) donosi rješenje kojim se odobrava održavanje javne priredbe na putu.

POGLAVLJE III - OBAVEZE

Član 17.

(Obaveze organizatora javne priredbe)

- (1) Organizator javne priredbe je fizičko ili pravno lice koje poziva na javnu priredbu, obavještava nadležnu organizacionu jedinicu Uprave policije, priprema, organizuje i vrši nadzor nad javnom priredbom, za cijelo vrijeme njenog trajanja.
- (2) Kad javnu priredbu saziva, odnosno organizuje grupa građana ili više pravnih lica, dužni su odrediti svog zajedničkog predstavnika.
- (3) Organizator javne priredbe dužan je:
 - a) dostaviti obavještenje nadležnoj organizacionoj jedinici Uprave policije, kad je to odredbama ovog zakona određeno,
 - b) voditi i nadzirati održavanje javne priredbe,
 - c) odrediti voditelja javne priredbe i angažovati redarsku službu,
 - d) organizovati, usmjeravati i nadzirati rad redara na izvršenju poslova propisanih odredbama člana 19. ovog zakona,
 - e) saradivati s predstavnicima nadležne organizacione jedinice Uprave policije u vezi s planiranjem mjera za održavanje reda i mira tokom održavanja javne priredbe i postupiti po njihovim mjerama naloženim u svrhu sigurnog održavanja javne priredbe,
 - f) omogućiti nesmetan prolazak vozilima hitne medicinske pomoći, policije i vatrogasnim vozilima kao i vozilima drugih službi potrebnim za održavanje lične i imovinske sigurnosti i zdravlja ljudi,
 - g) onemogućiti korištenje razglasa i drugih sredstava za pojačanje zvuka u svrhu prenošenja govora mržnje ili podsticanja na nasilje,
 - h) u saradnji sa predstavnicima nadležne organizacione jedinice Uprave policije prekinuti javnu priredbu ako nastupi stvarna opasnost da bi daljnjim održavanjem javne priredbe bili ugroženi sigurnost i zdravlje ljudi i imovina ili bi došlo do stvarne opasnosti od vršenja krivičnih djela, kao i nasilja ili narušavanja javnog reda i mira u većem obimu i
 - i) preduzimati potrebne mjere da bi se osigurao red i mir na javnoj priredbi i upozoravati učesnike o obavezi poštivanja zakona.
- (4) Organizator javne priredbe može odlučiti da obavljanje poslova na održavanju reda i mira na javnoj priredbi povjeri agenciji za osiguranje lica i imovine.

Član 18.

(Obaveze voditelja javne priredbe)

- (1) Organizator javne priredbe će odrediti voditelja javne priredbe.
- (2) Organizator javne priredbe može biti ujedno i voditelj javne priredbe i dužan je to navesti u obavještenju iz člana 11. ovog zakona.
- (3) Voditelj javne priredbe je fizičko lice određeno od organizatora javne priredbe koje postupa u skladu s odredbama člana 17. stav (3) tač. b), d), e), f), g), h) i i) ovog zakona.

Član 19.

(Obaveze redara)

- (1) Redar je fizičko lice određeno od strane organizatora javne priredbe, i dužan je:

- a) usmjeravati kretanje i pružati nethodne informacije učesnicima javne priredbe,
- b) štitiiti učesnike javne priredbe i imovinu koja se nalazi u objektu ili prostoru u kojem se održava javna priredba,
- c) izvršiti pregled lica koje ulazi u objekat ili prostor u kojem se održava javna priredba, te u skladu sa pravilima organizatora, spriječiti unošenje predmeta podobnih za nanošenje tjelesnih ozljeda,
- d) zabraniti ulazak u objekat ili prostor u kojem se održava javna priredba licu za koje procjeni da bi moglo narušiti javni red i mir, a posebno licu koje se nalazi u alkoholisanom stanju,
- e) upozoriti, odnosno zadržati lice koje narušava red i mir na javnoj priredbi i odmah ga predati policijskim službenicima,
- f) ostvarivati i održavati kontakt i saradnju sa policijskim službenicima o svim pitanjima od interesa za nesmetano održavanje javne priredbe i sigurnosti učesnika i
- g) prenositi informacije, upute i naređenja policijskih službenika učesnicima javne priredbe.

(2) Redar za vrijeme izvršavanja obaveza iz stava (2) ovog člana obavezno nosi prsluk fluorescentne boje sa vidno istaknutim natpisom „REDAR“, ili mora biti označen na drugi način koji nedvosmisleno ukazuje na njegovo svojstvo redara.

Član 20.

(Obaveze učesnika javne priredbe)

- (1) Učesnici javne priredbe ne smiju se javno izražavati i istupati na način suprotan odredbama člana 10. stav (1) ovog zakona.
- (2) Učesnici javne priredbe ne smiju nositi uniforme, dijelove uniforme, odjeće, oznake ili obilježja kojima se poziva ili podstiče na oružani sukob ili nasilje, kršenje ljudskih prava i sloboda i posebnih manjinskih prava i sloboda drugih lica, nacionalnu, rasnu, rodnu, vjersku ili drugu diskriminaciju, mržnju i netrpeljivost.
- (3) Lica koja prisustvuju javnoj priredbi dužna su postupiti po uputstvima organizatora javne priredbe, voditelja javne priredbe i redara ako su se stekli uslovi za prekid javne priredbe.

Član 21.

(Zabrana nošenja oružja, opasnih predmeta, opojne droge ili psihotropnih supstanci i alkoholnih pića)

Učesnicima javne priredbe, posmatračima, predstavnicima medija i licima koja se kreću prema mjestu održavanja javne priredbe, zabranjeno je nositi oružje, predmete podobne za nanošenje tjelesnih povreda, opojnu drogu ili psihotropne supstance i alkoholna pića.

Član 22.

(Policijski poslovi)

- (1) Poslove održavanja javnog reda i mira na prostoru koji se nalazi neposredno uz mjesto održavanja javne priredbe vrše policijski službenici nadležne organizacione jedinice Uprave policije.
- (2) Poslove održavanja reda i mira, zaštite sigurnosti lica i imovine, zaštite ljudskih prava i sloboda i posebnih manjinskih prava i sloboda drugih lica, zaštite zdravlja i druge poslove koji se odnose na osiguranje javne priredbe, na mjestu održavanja javne priredbe, vrši organizator javne priredbe u saradnji sa nadležnom organizacionom jedinicom Uprave policije, drugim nadležnim organima javne uprave i javnim službama.
- (3) Nadležna organizaciona jedinica Uprave policije može pismenim putem organizatoru naložiti samo one mjere u svrhu sigurnog održavanja javne priredbe, u roku koji ne može biti kraći od 24 sata od dostavljanja pismena.

Član 23.

(Troškovi za dodatne mjere osiguranja)

- (1) Organizator javne priredbe je dužan snositi troškove dodatnih mjera osiguranja koje će Uprava policije preduzeti u svrhu osiguranja javnog reda i mira na javnoj priredbi, izvan svoje redovne djelatnosti.
- (2) Izuzetno od stava (1) ovog člana, Vlada Kantona Sarajevo može donijeti odluku o oslobađanju svih ili dijela troškova iz stava (1) ovog člana.
- (3) O snošenju troškova iz stava (1) ovog člana, između organizatora ili njegovog zastupnika i nadležne organizacione jedinice Uprave policije, sklapa se ugovor o pružanju usluga najkasnije 48 sati prije početka održavanja javne priredbe.
- (4) Ministar će, na prijedlog policijskog komesara, donijeti propis o vrsti i cijeni usluga dodatnog angažovanja policijskih službenika i drugih usluga, kao i načinu plaćanja troškova iz stava (1) ovog člana.

POGLAVLJE IV – SPRJEČAVANJE, ODNOSNO PREKIDANJE JAVNE PRIREDBE

Član 24.

(Sprečavanje i prekid javne priredbe)

Nadležna organizaciona jedinica Uprave policije je ovlaštena da spriječi ili prekine javnu priredbu kada:

- a) je rješenjem zabranjeno održavanje javne priredbe,
- b) se održava suprotno odredbama člana 9. stav (2) ovog zakona,
- c) je prije ili tokom javne priredbe nastupio osnov iz člana 14. stav (1) tač. a), b) i d) ovog zakona i
- d) se održava na mjestu koje nije navedeno u obavještenju.

Član 25.

(Mjere za prekid javne priredbe)

- (1) Policijski službenici nadležne organizacione jedinice Uprave policije, koji vrše obezbjeđenje javne priredbe, dužni su preduzimati mjere i radnje rukovodeći se ciljem deeskalacije, te svaka preduzeta mjera i radnja mora biti nužna i proporcionalna okolnostima.
- (2) Kada nastupi neki od razloga iz člana 24. ovog zakona, predstavnik nadležne organizacione jedinice Uprave policije voditelju javne priredbe izdaje naredbu za sprječavanje ili prekid javne priredbe.
- (3) Voditelj javne priredbe je dužan drugim učesnicima javne priredbe saopćiti da je javna priredba prekinuta i zatražiti da se mirno razidu.
- (4) Ako voditelj javne priredbe ili drugi učesnici javne priredbe ne postupe u skladu s naredbom iz stava (2) ovog člana, policijski službenici će preduzeti mjere i radnje za njeno provođenje.

DIO TREĆI – DRUGI OBLICI OKUPLJANJA

Član 26.

(Pojam drugih oblika okupljanja)

Pod drugim oblicima okupljanja podrazumijevaju se javna okupljanja kojima je svrha ostvarivanje privrednih, vjerskih, kulturnih, humanitarnih, sportskih, zabavnih i drugih interesa koji nemaju za cilj ostvarivanje prihoda, kao i komercijalna javna okupljanja koja se organizuju u okviru registrovne djelatnosti ugostiteljskih objekata i u prostorima i objektima ugostiteljskih objekata.

Član 27.

(Obavještenje o održavanju drugih oblika okupljanja)

- (1) Organizator drugih oblika okupljanja iz člana 26. ovog zakona nije dužan nadležnoj organizacionoj jedinici Uprave policije dostaviti obavještenje o održavanju drugog oblika javnog okupljanja.
- (2) Izuzetno od stava (1) ovog člana, organizator drugih oblika okupljanja je dužan nadležnoj organizacionoj jedinici Uprave policije dostaviti potpisano obavještenje o održavanju drugih oblika okupljanja, najkasnije pet dana prije početka njegovog održavanja, ako karakter ili očekivani broj učesnika nalaže preduzimanje poslova u svrhu osiguranja javnog reda i mira, izvan redovne djelatnosti Uprave policije.
- (3) Obavještenje o održavanju drugih oblika okupljanja sadrži podatke iz člana 11. stav (2) ovog zakona, kao i trasu kretanja, mjesto polaska, zaustavljanja i završetka, kao i način kretanja učesnika (pješice, vozilima ili kombinovano) u slučaju drugog oblika okupljanja u pokretu,
- (4) Obavještenje o održavanju javne priredbe ili drugog oblika okupljanja nalazi se na Obrascu broj 1. iz člana 11. stav (3) ovog zakona.
- (5) Svaka bitnija izmjena sadržaja obavještenja o održavanju drugog oblika okupljanja, smatra se dostavljanjem novog obavještenja.

Član 28.

(Primjena odredbi zakona na druge oblike okupljanja)

Odredbe ovog zakona DIO DRUGI – JAVNE PRIREDBE, čl. 9., 10., 12., 13., 14., 15., 16., 17, 18., 19., 20., 21., 22., 24. i 25., odgovarajuće se primjenjuju i na druge oblike okupljanja iz člana 27. stav (2) ovog zakona.

DIO ČETVRTI - PREKRŠAJNE SANKCIJE

Član 29.

(Novčane kazne za pravno ili fizičko lice, organizatora javne priredbe ili drugog oblika okupljanja)

- (1) Novčanom kaznom od 3.000 do 9.000 KM kaznit će se pravno lice, organizator javne priredbe ili drugog oblika okupljanja, za sljedeće prekršaje:
 - a) ako održi javnu priredbu ili drugi oblik okupljanja suprotno odredbama člana 9. stav (2) ili člana 28., a u vezi sa članom 9. stav (2) ovog zakona
 - b) ako održi javnu priredbu ili drugi oblik okupljanja koji su zabranjeni rješenjem nadležne organizacione jedinice Uprave policije (član 14. stav (1) ili član 28., u vezi sa članom 14. stav (1) ovog zakona) i
 - c) ako ne postupi u skladu sa odredbama člana 17. st. (2) i (3) ili člana 28., u vezi sa članom 17. st. (2) i (3) ovog zakona.
- (2) Za prekršaj iz stava (1) ovog člana kazniće se odgovorno lice u pravnom licu, organizatoru javne priredbe ili drugog oblika okupljanja, novčanom kaznom od 500 do 1.500 KM.
- (3) Za prekršaj iz stava (1) ovog člana kazniće se fizičko lice, organizator javne priredbe ili drugog oblika okupljanja, novčanom kaznom od 1.000 do 3.000 KM.

Član 30.

(Novčana kazna za vođitelja javne priredbe ili drugog oblika okupljanja)

Novčanom kaznom od 1.000 do 3.000 KM kaznit će se za prekršaj vođitelj javne priredbe ili drugog oblika okupljanja koji ne postupi u skladu sa odredbama člana 18. stav (3) ovog zakona.

Član 31.

(Novčana kazna za redara na javnoj priredbi ili drugom obliku okupljanja)

Novčanom kaznom od 300 do 900 KM kaznit će se za prekršaj redar na javnoj priredbi ili drugom obliku okupljanja koji ne postupi u skladu sa odredbama člana 19. ovog zakona.

Član 32.

(Novčana kazna za učesnika ili drugo lice na javnoj priredbi ili drugom obliku okupljanja)

- (1) Novčanom kaznom od 500 do 1.500 KM kaznit će se fizičko lice, učesnik javne priredbe ili drugog oblika okupljanja koji ne postupi u skladu sa odredbama člana 20. ovog zakona.
- (2) Novčanom kaznom od 500 do 1.500 KM kaznit će se fizičko lice, učesnik ili drugo lice na javnoj priredbi ili drugom obliku okupljanja koje ne postupi u skladu sa odredbama člana 21. ovog zakona.
- (3) Okrivljenom za prekršaje iz st. (1) i (2) ovog člana, sud može rješenjem o prekršaju, a policijski službenik Uprave policije može prekršajnim nalogom, izreći zaštitnu mjeru oduzimanja predmeta.

Član 33.

(Privremeno oduzimanje predmeta)

Kada u vršenju službenih poslova i zadataka saznaju za prekršaj propisan ovim zakonom, policijski službenici mogu privremeno oduzeti predmete koji su upotrijebljeni ili su bili namijenjeni za izvršenje prekršaja ili koji su nastali izvršenjem prekršaja, kao i predmete koji mogu poslužiti kao dokaz u prekršajnom postupku.

Član 34.

(Postupak sa oduzetim predmetima)

Uprava policije će postupiti sa oduzetim predmetima u skladu sa odlukom nadležnog suda ili odlukom rukovodioca nadležne organizacione jedinice Uprave policije donesenom u skladu sa odredbama Uredbe o smještaju, čuvanju i postupanju sa privremeno oduzetim predmetima od strane policijskih službenika Uprave policije Ministarstva unutrašnjih poslova Kantona Sarajevo ("Službene novine Kantona Sarajevo", broj 2/20).

DIO PETI - PRIJELAZNE I ZAVRŠNE ODREDBE

Član 35.

(Započeti postupci)

Svi postupci koji do dana stupanja na snagu ovog zakona nisu pravosnažno okončani završit će se po odredbama zakona koji je bio na snazi u vrijeme pokretanja postupka.

Član 36.

(Nadležnost za vršenje nadzora nad primjenom zakona)

Nadzor nad primjenom ovog zakona vrše policijski službenici Uprave policije.

Član 37.

(Informisanje)

- (1) Uprava policije jednom godišnje, najkasnije do kraja januara tekuće godine, Skupštini Kantona Sarajevo podnosi Informaciju o provođenju Zakona o javnim priredbama i drugim oblicima okupljanja na području Kantona Sarajevo, za prethodnu godinu.
- (2) Informacija iz stava (1) ovog člana sadrži:
 - a) broj zaprimljenih obavještenja o javnoj priredbi i drugom obliku okupljanja,
 - b) broj održanih javnih priredbi i drugih oblika okupljanja,
 - c) broj zabranjenih javnih priredbi i drugih oblika okupljanja i razlozima zabrane,

- d) broj preduzetih policijskih poslova i primjenjenih policijskih ovlaštenja (npr. preduzeto mjera osiguranja, angažovano policijskih službenika, materijalno-tehničkih sredstava, izdato upozorenja ili naređenja, izdato prekršajnih naloga, podneseno zahtjeva za pokretanje prekršajnog postupka, broj prekršaja, broj zaštitnih mjera i dr.) i
- e) druge podatke od značaja za oblast javnih priredbi i drugih oblika okupljanja na području Kantona Sarajevo.

(3) Informacija iz st. (1) i (2) ovog člana obuhvata i odgovarajuće podatke o provođenju zakona iz člana 4. stav (2) ovog zakona.

Član 38.

(Donošenje propisa)

U roku od šest mjeseci od dana stupanja na snagu ovog zakona ministar će, na prijedlog policijskog komesara, donijeti propis iz člana 23. stav (4) ovog zakona.

Član 39.

(Prestanak važenja zakona)

Danom stupanja na snagu ovog zakona prestaje da važi Zakon o javnom okupljanju ("Službene novine Kantona Sarajevo", br. 32/09 i 11/11), u dijelu koji se odnosi na javne priredbe i druge oblike okupljanja.

Član 40.

(Stupanje na snagu zakona)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj: _____
Sarajevo, __.__.____. godine

PREDSJEDAVAJUĆI
SKUPŠTINE KANTONA SARAJEVO
